

禅学四种



福建莆田广化寺佛经流通处

禅海十珍

传心法要

顿悟
入道要门论

真心直说



國立中央圖書館藏

海士錄

海士錄

海士錄

述曰夫別傳之道不

述曰夫別傳之道不

言說六德之後二支

言說六德之後二支

海恆沙法

海恆沙法

乃自本有性

乃自本有性

者爭以智論量

者爭以智論量

且貪多徇終身

且貪多徇終身

是拈此十篇

是拈此十篇

意存乎其人

意存乎其人

禪海十珍

禪海十珍集

清福州鼓山湧泉寺沙門道需集

述曰。夫別傳之道。本離文彩。然垂手接人。亦不廢言說。六傳之後。二支五派。浩浩說禪。智者悟之。性海汪洋。恆沙法寶。自然流出。豈從修得。非自學來。乃自心本有性功德耳。但時當末運。人根漸下。上者爭以世智。論量大法。下者甘自守愚。菽麥不分。且貪多得。終身役役。而不知其所歸。豈不惜哉。於是拈此十篇綱宗。爲初學標準。言約義明。行止勤怠。存乎其人。實不在編輯之多耳。

○七佛傳法偈第一

毘婆尸佛偈曰。身從無相中受生。猶如幻出諸形像。
幻人心識本來無。罪福皆空無所住。

尸棄佛偈曰。起諸善法本是幻。造諸惡業亦是幻。身
如聚沫心如風。幻出無根無實性。

毘舍浮佛偈曰。假借四大以爲身。心本無生因境有。
前境若無心亦無。罪福如幻起亦滅。

拘留孫佛偈曰。見身無實是佛見。了心如幻是佛了。
了得身心本性空。斯人與佛何殊別。

拘那含牟尼佛偈曰。佛不見身知是佛。若實有知別。

無佛。智者能知罪性空。坦然不懼於生死。

迦葉佛偈曰。一切眾生性清淨。從本無生無可滅。卽此身心是幻生。幻化之中無罪福。

釋迦牟尼佛偈曰。法本法無法。無法法亦法。今付無法時。法法何曾法。

釋曰。七佛傳法偈。皆破身心妄見。良以眾生無始劫來。迷失真性。妄認四大爲身。六塵緣影爲心。旣已迷己爲物。而復認物爲己。從迷入迷。展轉無涯。故佛佛道破。令於身心中。悟明身心。了不可得。法身眞智。觀體圓明。所謂了得身心本性空。斯人與

佛何殊別。佛語當信。幸無錯會也。

○初祖達磨尊者入道四行第二

初祖云。夫入道多途。要而言之。不出二種。一是理入。二是行入。理入者。藉教悟宗。深信含生同一真性。但爲客塵妄想所覆。不能顯了。若捨妄歸真。凝住壁觀。無自無他。凡聖等一。堅住不移。更不隨於文教。此卽與道冥符。無有分別。寂然無爲。名理入也。行入者。四行爲要。其餘諸行。悉入此中。何等四耶。一。報冤行。二。隨緣行。三。無所求行。四。稱法行。云何名報冤行。謂修道行人。若受苦時。當自念言。我從往昔無數劫中。棄

本從末。流浪諸有。多起冤憎。違害無限。今雖無犯。是我宿殃。惡業果熟。非天人所與。甘心忍受。都無冤訴。經云。逢苦不憂。識達故也。此心生時。與道相應。體冤進道。故言報冤行二。隨緣行者。眾生無我。並緣業力所轉。苦樂等受。皆從緣生。若得勝報。榮譽等事。是我過去宿因所感。今方得之。緣盡還無。何喜之有。得失從緣。心無增減。喜怒俱無。冥順於道。名隨緣行也。三。無所求行者。世人長迷。處處貪著。名之爲求。智者悟眞。理與俗反。安貧無求。形隨運轉。萬有斯空。無所願樂。功德黑暗。常相隨逐。三界無安。猶如火宅。有身皆

苦。誰得常安。了達此處。息想無求。經云。有求皆苦。無求乃樂。故知無求。眞爲道行。是名無所求。行也。四。稱法行者。性淨理體。目之爲法。此理眾相皆空。無染無著。無此無彼。經云。法無眾生。離眾生垢故。法無有我。離我垢故。智者若能信解此理。應當稱法而行。法體無慳。於身命財。行施無慳。達解三空。不倚不著。感化眾生。亦無化相。此爲自利利他。亦能莊嚴菩提之道。施度旣爾。餘五亦然。除妄修真。行於六度。而無所行。是爲稱法行也。

釋曰。初祖於別傳外。復示理行二門者。囑別傳人。

須履踐耳。昔太守楊銜之問初祖曰。西天相承爲祖。其道如何。祖曰。明佛心宗。解行相應。名之曰祖。後六祖問南嶽讓曰。什麼物。恁麼來。讓曰。說似一物。卽不中。六祖曰。還可修證否。讓曰。修證卽不無。污染卽不得。據此。豈可徒恃見解而撥去修證乎。何者。蓋見道而不修報冤行。則有冤報時。鼓忿恨風。吹心識火。可乎。苟不修隨緣行。遇榮譽等事。則心生貪著。爲喜風飄蕩。可乎。苟不修無所求行。則貪心熾盛。種種馳求。何時休息。可乎。苟不修稱法行。雖修六度。而滯有爲。可乎。若然。則與未見道者。

何以異耶。故見道者。當稱法行。貪求永息。知緣無
生。不生執著。冤親平等。忍受冤報。能如是。可謂明
佛心宗。解行無玷。庶幾無愧於佛祖矣。

○三祖僧璨禪師信心銘第三

至道無難。唯嫌揀擇。但莫憎愛。洞然明白。毫釐有差。
天地懸隔。欲得現前。莫存順逆。違順相爭。是爲心病。
不識元旨。徒勞念靜。圓同太虛。無欠無餘。良由取捨。
所以不如。莫逐有緣。勿住空忍。一種平懷。泯然自盡。
止動歸止。止更彌動。唯滯兩邊。寧知一種。一種不通。
兩處失功。遣有沒有。從空背空。多言多慮。轉不相應。

絕言絕慮。無處不通。歸根得旨。隨照失宗。須臾返照。
勝卻前空。前空轉變。皆由妄見。不用求真。唯須息見。
二見不住。慎莫追尋。纔有是非。紛然失心。二由一有。
一亦莫守。一心不生。萬法無咎。無咎無法。不生不心。
能由境滅。境逐能沈。境由能境。能由境能。欲知兩段。
原是一空。一空同兩。齊含萬象。不見精麤。寧有偏黨。
大道體寬。無易無難。小見狐疑。轉急轉遲。執之失度。
必入邪路。放之自然。體無去住。任性合道。逍遙絕惱。
繫念乖真。昏沈不好。不好勞神。何用疎親。欲取一乘。
勿惡六塵。六塵不惡。還同正覺。智者無爲。愚人自縛。

法無異法。妄自愛著。將心用心。豈非大錯。迷生寂亂。
悟無好惡。一切二邊。良由斟酌。夢幻空華。何勞把捉。
得失是非。一時放卻。眼若不寐。諸夢自除。心若不異。
萬法一如。一如體元。兀爾忘緣。萬法齊觀。歸復自然。
泯其所以。不可方比。止動無動。動止無止。兩既不成。
一何有爾。究竟窮極。不存軌則。契心平等。所作俱息。
狐疑盡淨。正信調直。一切不畱。無可記憶。虛明自照。
不勞心力。非思量處。識情難測。真如法界。無他無自。
要急相應。唯言不二。不二皆同。無不包容。十方智者。
皆入此宗。宗非促延。一念萬年。無在不在。十方目前。

極小同大。忘絕境界。極大同小。不見邊表。有卽是無。無卽是有。若不如是。必不須守。一卽一切。一切卽一。但能如是。何慮不畢。信心不二。不二信心。言語道斷。非去來今。

釋曰。三祖信心銘。句句直指心體。揀去心病。示歸元路。契無作功。令人自信自肯。不向外求耳。雖然。心是何物而可信。信是何物而信心。水不洗水。金不博金。故云。信心不二。不二信心。言語道斷。非去來今。若更作義解商量。早是開眼作夢。

○六祖大鑒禪師二種三昧第四

六祖曰。諸善知識。汝等各各淨心。聽吾說法。汝等諸人。自心是佛。更莫狐疑。外無一物。而能建立。皆是本心生萬種法。故經云。心生種種法生。心滅種種法滅。若欲成就種智。須達一相三昧。一行三昧。若於一切處。而不住相。於彼相中。不生憎愛。亦無取舍。不念利益。成壞等事。安閒恬靜。虛融澹泊。此名一相三昧。若於一切處。行住坐臥。純一直心。不動道場。眞成淨土。名一行三昧。若人具二三昧。如地有種。含藏長養。成熟其實。一相一行。亦復如是。我今說法。猶如時雨。普潤大地。汝等佛性。譬如種子。遇茲霑洽。悉得發生。承

吾旨者決獲菩提。依吾行者定證妙果。

釋曰。六祖說二種三昧。乃日用踐履之捷徑。據祖意。一相則於境上洞達實相。不住幻相。一行則心常質直。安住實相。不落第二念。心境皆空。與理冥符。謂之三昧。文殊般若經云。何名一行三昧。佛言。法界一相。繫緣法界。是名一行三昧。入一行三昧者。盡知恆沙諸佛法界。無差別相。夫法界一相。卽一相三昧。繫緣法界。卽一行三昧。是理行之別名耳。今祖意二種皆行。乃冥契於理。究竟無二也。

○永嘉真覺大師證道歌第五

南巢宏德
禪師著語